

大方便佛報恩經卷第四

墨四

失譯人名出後漢錄

惡友品第六

爾時世尊大衆圍遶供養恭敬尊重讚歎爾時如來熙怡微笑從其面門放大光明青黃赤白名曰大悲遠照十方上至阿迦臘吒天^{三十四}下至十八地獄照提婆達多身諸苦痛即得安寧爾時大衆異口同音讚歎如來善哉善哉世尊真是大慈真是大悲能於怨親其心平等提婆達多常懷惡心毀害如來而世

尊不以爲患愍而哀傷放大悲光遠照其身如來爾時普告大衆而作是言提婆達多非適今世而傷害我過去世時常欲害我我以慈悲力因乃得濟爾時阿難觀察衆心咸皆有疑即從座起偏袒右肩右膝著地胡跪合掌而白佛言世尊提婆達多過去世時毀害世尊其事云何佛告阿難善聽吾當爲汝分別解說佛言過去世時無量千歲有國名波羅柰其中有佛出世號毗婆尸如來應供正遍知明行足善逝世間解無上士調御丈夫

天人師佛世尊在世教化滿十千歲滅度之後正法住世十二千歲像法滅後波羅奈王名摩訶羅闍聰穀仁賢正法治國不枉人民王主六十小國八百聚落五百白象二萬夫人了無有子王自禱祀諸山河池樹木神祇滿十二年王第一所重夫人即便有娠第二夫人亦皆有娠王甚歡喜手自供養牀卧飲食皆令細軟至滿十月太子便生形體端正妙色莊嚴人相具足第二夫人亦皆生男王甚歡喜即召諸臣百官并諸相師婆羅門等

占相吉凶抱兒示之便令立字相師問言此兒生時有何瑞相答言第一太子其母性行由來弊惡恚恨妬忌憍慢自大從懷子已來其性調善和顏悅色發言含笑先意問訊軟語利益慈愍衆生喻如赤子相師答言此是兒之福德使母如此即便立字名曰善友太子第二夫人所生太子者相師問言其子生時有何瑞相答言其母由來性常調善先意問訊發言柔軟可適衆心懷妊已來其性卒暴發言塵穢惡嫉妬恚癡相師答言此是兒之

業行使母如是應當立字名曰惡友太子乳哺長大至年十四善友太子聰明慈仁好喜布施父母偏心愛念視如眼目惡友太子其性暴惡父母憎惡而不喜視嫉妬於兄常欲毀害觸事不順其兄違逆反戾善友太子導從前後作倡妓樂大衆圍遶出城觀看見有耕者墾土出蟲鳥隨啄吞善友太子遙見如是愍而哀傷生長深宮未見此事問左右言此作何物共相殘害左右答言太子所以有國依於人民所以有人民者依因飲食所以

有飲食者依因耕田種植五穀得存性命太子念言苦哉苦哉少復前行見諸男女自紡織來往傾動疲勞辛苦太子問曰此作何物左右答言太子此諸人等紡織作諸衣服以遮慚愧蔭覆五形太子言此亦勞苦非一也轉復前行見諸人民屠牛駝馬剝剥豬羊三太子問曰此是何人左右答言此諸人等屠殺賣肉以自存活以供衣食太子皮毛瞞動而作是言怪哉苦哉殺者心不忍強弱相害傷殺生以養生積結累劫之殃轉復前行見

諸衆人網鳥餉魚枉濫無辜強弱相凌太子問言此是何人名何事耶左右答言太子網鳥捕魚如是諸事以供衣食太子聞是語已悲淚滿目世間衆生造諸惡本衆苦不息憂愁不悅即迴車還宮王問太子出還何故憂愁如此太子具以上事向父王說王聞是語語太子言上來諸事未常不有何足愁耶太子言今欲從王求索一願王見聽不王言吾有汝一子甚愛念之不逆汝意太子言願欲得父王一切庫藏所有財寶飲食用施一切

王言隨汝所願不逆子意善友太子即使傍臣開王庫藏以五百大象肩載珍寶出四城門外宣令國土其有欲得衣被飲食者恣意自取而去善友太子名聲遠聞八方一切雲集未久之間三分用二時守庫藏臣即入白王所有庫藏太子已三分用二王宜思之王言此是太子不敢違逆復經少時諸臣論議所以有國依因庫藏庫藏空竭國亦虛存復往白王所有財寶三分用二王宜思之王言是吾太子不敢違逆汝可小稽遲莫稱其心

善友太子欲開庫藏時守藏臣緣行不在鄭重追逐差互不遇善友太子言此小人者何敢違逆我意當是父王教耳夫孝子者不應傾竭父母庫藏我今應當自求財寶給足衆生我若不能給足一切衆生衣被飲食稱意

四

與者云何名爲大王太子即集諸臣百官共論議言夫求財利何業最勝中有第一大臣言世間求利莫先耕田者種一得萬倍復有一大臣言世間求利莫先畜養衆生放牧繁殖其利最大復有一大臣言世間求利莫先

入海採取妙寶若得摩尼寶珠者便能稱意給足一切衆生善友太子言唯此爲快耳即入宮中上白父王子今欲入大海採取妙寶王聞此語譬如人噎亦不得咽又不得吐語太子言國是汝有庫藏珍寶隨意取用何爲方復自入大海汝爲吾子生長深宮卧則幃帳食則恣口今者遠涉途路飢渴寒暑誰得知者又復大海之中衆難非一或有惡鬼毒龍湍浪猛風迴波涌洑水泡之山摩竭大魚往者千萬達者一二汝今云何欲入大海吾

不聽汝善友太子即便五體投地四布手足而作是言父母若不聽我入大海者我當捨命於此終不起也爾時大王及諸夫人見是事已目不暫捨即前勸諫太子汝可起飲食五太子言若不聽我入大海者終不飲食王與夫人愁憂苦惱左右啼泣憂悲悽惻愁悶躰五於是乃至一日不飲不食二日三日至到六日父母憂恐畏其不濟七日即前鳴抱手足善言誘喻可起飲食此段食身依因飲食而得存立不飲食者汝命不濟太子言父母

若不聽許者必沒於此終不起也爾時第一夫人便白王言如子心意難可傾動不可違戾何忍當見此子捨命於此願大王垂慈聽入大海故當萬有一冀今不聽者必喪於此王不忍拒而便聽許爾時善友太子即起歡喜頭面禮父王足左右夫人及諸婦女百千萬人互相問言善友太子今者爲死活耶答言太子今者已起歡喜飲食王問太子汝慇懃欲入大海何所作爲答言大王欲取摩尼大寶給足一切衆生所須爾時大王即遍宣

令誰欲入海若往還者七世衣食珍寶無所乏少吾當供給道路船乘所須善友太子亦欲入海採取珍妙摩尼寶珠衆人聞之歡喜聚集具五百人皆言大王我等今者隨從太子爾時波羅柰國有一海師前後數反入於大海善知道路通塞之相而年八十兩目蒙盲爾時波羅柰大王徃導師所郭言導師吾唯一子未更出門勞屈大師入於大海願見隨從爾時導師即舉聲大哭大王大海留難辛苦非一往者千萬達者一二大王今者云

何乃能令太子遠涉嶮道王報導師為憐愍故隨從聽許導師白言不敢違逆爾時善友太子莊嚴五百人行具載至大海邊爾時其弟惡友太子作是念言善友太子父母而常偏心愛念今入大海採取妙寶若達還者父母當遺棄於我作是念已往白父母今我亦欲隨從善友入海採取妙寶父母聞已答言隨意道路急難之時兄弟相隨必相救護至大海已以七鐵鎖鎖其船舫停住七日至日初出時善友太子擊鼓唱令汝等諸人誰欲

入海入者默然若當戀著父母兄弟婦兒閭浮提樂者從此還歸莫爲我故所以者何大海之中留難非一往者千萬達者一二如是唱令大衆默然即斷一鎖舉著船上日日唱今至第七日即斷七鎖舉著船上望風舉帆以太子慈心福德力故無諸留難得至海洲至珍寶山到寶所已善友太子即便擊鼓宣令諸人當知道路懸遠汝等諸人速載珍寶極停七日復作是言此寶甚重閭浮提中亦無所直莫大重載船舫沉沒不達所至莫大

輕取道路懸遠不補勞苦裝束已訖與諸人別而作是言汝等於是善安隱歸吾方欲前進採摩尼寶珠爾時善友太子與盲導師前進路行一七水齊到膝復更前行一七水齊到頸前進一七浮而得渡即到海處其地純以白銀爲沙導師問言此地何物太子答言其地純是白銀沙導師言四望應當有白銀山汝見未耶太子言東南方有一白銀山現導師言此道在此山下至彼山已導師言次應到金沙爾時導師疲乏悶絕躋地語太子

言我身命者熟不得久必喪於此太子於是東行一七當有金山從山復更前進一七其地純是青蓮華復前行一七其地純是紅赤蓮華過是華已應有一七寶城純以黃金而爲却敵白銀以爲樓櫓以赤珊瑚爲其障板碑礫瑪瑙雜廁間錯真珠羅網而覆其上七重塗墨純紺瑠璃八海龍王所止住處其龍王左耳中有一摩尼如意寶珠汝往從乞若得此珠者能滿間淨提兩衆七寶衣被飲食病瘦醫藥音樂倡伎總要而言一切衆生所

須之物隨意能雨是故名之如意寶珠太子若得是珠者必富滿汝本願爾時導師作是語已氣絕命終爾時善友太子即前抱持導師舉聲悲哭一何薄命生失我所天即以導師金沙覆上埋著地中右繞七匝頂禮而去前至金山過金山已見青蓮華遍布其地其蓮華下有青毒蛇此蛇有三種毒所謂齒毒觸毒氣噓毒此諸毒蛇以身繞蓮華莖張目喘息而視太子爾時善友太子即入慈心三昧以三昧力即起進路踢蓮華而去時諸毒

蛇而不毀傷以慈心力故逕至龍王所止住處其城四邊有七重漸其城塹中滿中毒龍以身共相蟠結舉頭交頸守護城門爾時太子到城門外見諸毒龍即慈心念閻浮提一切衆生今我此身若爲此毒龍所害者汝等

卷四

一切衆生皆當失大利益爾時太子即舉右手告諸毒龍汝等當知我今爲一切衆生欲見龍王爾時諸毒龍即開路令太子得過乃至七重塹守城毒龍得至城門下見二玉女紡頗梨縷太子問曰汝是何人答言我是龍王

守外門婢問已前入到中門下見四王女紡白銀縷太子復問汝是龍王婦耶答言非也是龍王守中門婢耳太子問已前入到內門所見八玉女紡黃金縷太子問曰汝是何人答言我是龍王守門婢耳太子語言汝爲我通大海龍王閻浮提波羅柰王善友太子故來相見今在門下時守門者即白如是王聞是語疑怪所以作是念言自非福德純善之人無由遠涉如是嶮路即請入宮王出奉迎其龍王宮紺瑠璃爲地牀座七寶有種種

光明耀動人目即請令坐共相問訊善友太子因爲說法示教利喜種種教化讚說施論戒論人天之論時大海龍王心大歡喜遠屈途涉欲須何物太子言大王閻浮提一切衆生爲衣財飲食故受無窮之苦今欲從王乞

星四九

左耳中如意摩尼寶珠龍王言受我微供一
七日當以奉給爾時善友太子受龍王請過
七日已持摩尼寶珠還閻浮提時大海龍王
使諸龍神飛空送之得到此岸見弟惡友問
言汝徒黨伴侶今何所在答言善友船舫沉

沒一切死盡唯第一身牽挽死屍而得全濟
一身財賄一切已盡善友答言天下大寶莫
先已身弟言不爾八願富死不貧而生何以
知然弟曾至塚間聞諸死鬼作如是語善友
太子其性真直以實語弟汝雖失寶亦是閑
耳吾今已得龍王如意摩尼寶珠弟言今在
何處善友答言今在髻中弟聞是語心生嫉妒
憂恚懊惱作是念言父母而常偏心愛念
今復加得摩尼寶珠我身今者父母惡賤甚
於瓦礫作是念已白善友言快哉甚善得此

寶珠今此嶮路宜加守護爾時善友即解寶珠與弟惡友而誠勑言汝若疲乏眠卧我當守護我若眠卧汝應守護爾時惡友次應守珠其兄眠卧即起求二乾竹刺兄兩目奪珠而去爾時善友即與其弟惡友此有賊刺我兩目持寶珠而去惡友不應兄便懊惱我弟惡友似爲賊所殺如是高唱聲動神祇經久不應爾時樹神即發聲言汝弟惡友是汝惡賊刺汝兩目持寶珠去汝今喚惡友何爲善友太子聞是語已悵然飲氣憂恚苦惱爾時

惡友賣持寶珠還歸本國與父母相見白言父毋我身福德而得全濟善友太子與諸徒伴薄福德故沒水死盡父母聞是語已舉聲大哭悶絕躡地以冷水灑面良久乃蘇父母語惡友言汝云何乃能持是回來惡友聞是語已心生懊惱即以寶珠埋著土中爾時善友太子被刺兩目乾竹刺者無人爲拔徘徊宛轉靡知所趣當時苦惱大患飢渴求生不得求死不得漸漸前行到利師跋王國利師跋王有女先許與波羅柰王善友太子利師

跋王有一牧人名留悉爲利師跋王放五百牛隨逐水草爾時善友太子坐在道中爾時牛羣垂逼踐踰中有牛王即以四足騎太子上令諸牛羣皆悉過盡然後移足右旋宛轉反顧迴頭吐舌舐太子兩目拔出竹刺爾時牧牛人尋後得見問言汝是何人善友即自念言我今不應自陳本末炳說上事脫令我弟得大苦惱答言我是盲乞兒耳時牧牛人遍體觀望人相有異語言我家在近當供養汝時牧牛人即將善友還歸其家與種種飲

食誠勑家中男女大小汝等供待此人如我不異如是經一月餘日其家厭患而作是言家計不豐云何能常供是盲人善友聞是語已心意悵然過是夜已至明日旦白主人言我今欲去主人報言有何不適而欲捨去善友答言客主之義勢不得久善友言汝若愛念我者爲我作一鳴箏送我著多人民處大城聚落爾時主人即隨意供給送到利師跋城多人衆處安隱還歸善友善巧彈箏其音和雅悅可衆心一切大衆皆共供給飲食乃

星四

十一

至充足利師跋道上五百乞兒皆得飽滿時國王有一果園其園茂盛常患鳥雀時守園監語善友言爲我防護鳥雀我當好相供給善友答言我無兩目云何能爲汝驅馳鳥雀耶守園監言我有方便我以繩結諸樹頭安施銅鈴汝坐樹下聞鳥雀聲牽挽繩頭善友答言如是我能將至樹下安隱住已即捨而去善友防護鳥雀兼復彈箏以自娛樂時利師跋王女將諸侍從入園觀看見此盲人即往其所問言汝是何人答言盲乞人耳王女

見已心生愛念不能捨離王復遣使往喚其女言不去爲我送食共此盲人飲食訖竟白大王言王今持我與此盲人甚適我願王言汝鬼魅所著願狂心亂云何共是盲人共居汝不知耶父母先以汝許與波羅柰王善友太子善友今者入海未還汝今云何爲乞人作婦女言雖爾乃至捨命終不捨離王聞是語不能拒逆即遣使者將盲人來閉著靜室爾時王女往盲人所語言知不我今欲共汝作夫婦善友報言汝是誰家女欲爲我婦

答言我是利師跋王女善友報言汝是王女
我是乞人云何能相恭敬婦言我當盡心供
養於汝不逆汝意如是經九十日其婦小事
出行不白其夫良久乃還善友^鑑數汝私出
第十四
外而不白我何處行還婦言我不私行^{十二}婿言
私與不私誰當知汝其婦懊惱悲淚滿目即
目呪誓言我若私行令汝兩目始終不差若
不爾者使汝一目平復如故作是願已其夫
一眼目瞑瞞動平復如故睛光晃晃喻如流
星視瞻清徹得見其婦婦言何如汝信我不

善友含笑婦言汝不識恩養我是大國王女
汝是小人而我盡心供事於汝而不體信婿
言汝識我不答言我識汝是乞人婿言非也
我是波羅柰王善友太子婦言汝大愚癡人
云何乃發是言波羅柰王善友太子入海未
還汝今云何言是其人此妄言耳吾不信也
善友言我從生來未曾妄語婦言虛之與實
誰當信之婿言我若妄語欺誑汝者使我一
目永不得愈若實語者使我一日平復如故
令汝得見作是念已即如所誓睛光耀動如

本不異善友太子兩目平復面首端正人相
具足妙色超絕世無有比其婦見已心生歡喜如蒙賢聖遍體瞻視目不暫捨即入宮中白父王言今我夫者即是善友太子王言癡人顛狂鬼魅所著而作是言善友太子入海未還汝今云何名是乞人爲太子也女言不也若不信者可一視之王即往看見已便識是善友太子即懷恐怖而作是言波羅奈王讚歎其人遂成其言如是如是爾時善友太子未入大海在宮殿時養一白鷹衣被飲食行住坐卧而常共俱爾時夫人往到其所報實不知太子言無苦爲我餉致給與此牧牛

人利師跋王即以金銀珍寶衣被飲食并與所放五百頭牛其人歡喜稱善無量善友太子而我未有幾許恩分而能報我如是財賄時放牛人於大衆中高聲唱言夫陰施陽報布施之事果報弘廣爾時無量大衆心生歡喜皆發施心拯濟一切求佛爲本虛空神天讚歎其人遂成其言如是如是爾時善友太子未入大海在宮殿時養一白鷹衣被飲食行住坐卧而常共俱爾時夫人往到其所報其鴈言太子在時常共汝俱今入大海未還

生死未分而我不能得知定實汝今云何不
感念太子鴈聞是語悲鳴宛轉啼淚滿目報
言大夫人欲使求覓太子者不敢違命爾時
夫人手自作書繫其鴈頸其鴈音響問太子
大海所在身昇虛空飛翔宛轉而去夫人見
已心生恃賴今者此鴈其必定得我子死活
之實消息飛至大海經過周遍求覓不見次
第往到利師跋國遙見善友太子在宮殿前
其鴈歛身擁翅往趣到已悲鳴歡喜太子即
取母書頭頂禮敬發封披讀即知父母晝夜

悲哭追念太子兩目失明爾時太子即作手
書具以上事向父母說復以書繫其鴈頸其
鴈歡喜還波羅柰父母得太子書歡喜踊躍
稱善無量具知太子爲弟惡友之所危害奪
取寶珠苦惱無量父母尋時杻械惡友手腳
枷鎖頸項閉著牢獄遣使往告利師跋王汝
今云何擁遮太子令我憂苦利師跋王聞是
語已心生恐怖即嚴服太子送著界上太子
遣使往白利師跋王善友從大海歸爾時利
師跋王作倡伎樂前後導從掃灑燒香懸繒

旛蓋幢鍾鳴鼓遠迎太子還至宮中以女娉
之遣送往詣波羅柰國父母聞太子歸歡喜
無量乘大名象作倡伎樂掃灑燒香懸繒旛
蓋遠迎太子國土人民男夫女婦聞太子入
于大海安隱還歸歡喜無量亦皆出迎善友
太子前爲父母頭面禮足王與夫人目瞑不
見太子形容以手捫摸汝是我子善友非耶
父母念汝憂苦如是太子問訊父母起居訖
竟舉手高聲報謝諸小國王及謝群臣國土
人民一切大衆而作是言苦屈大衆從是還

歸善友太子白父王言我弟惡友今在何處
王言汝不須問訊如是惡人今在牢獄不可
放也善友太子言願放惡友得與相見如是
言至三王不忍拒便開獄門爾時惡友手脚
杻械頸項枷鎖往見善友兄見是上白父
母爲弟脫於枷鎖脫枷鎖已即前抱持善言
誘諭軟語問訊汝極勞苦耶汝持我寶珠今
在何處如是至三而方報言在彼土中善友
太子還得寶珠往父母前長跪燒妙寶香即
呪誓言此珠實是如意寶者令我父母兩目

明淨如故作是願已尋時平復父母得見其子歡喜踊躍慶幸無量爾時善友太子於月十五日朝淨自澡浴著鮮淨衣燒妙寶香於高樓上手捉香爐頭面頂禮摩尼寶珠立誓願言我爲閻浮提一切衆生故忍大辛苦求是寶珠爾時東方有大風起吹去雲霧虛空之中皎然明淨并閻浮提所有糞穢大小便利灰土草莽涼風動已皆令清淨以珠感德於閻浮提遍雨成熟自然粳米香甘軟細色味具足溝渠盈滿積至于膝次雨名衣上服

珠環釦釧次雨金銀七寶衆妙妓樂舉要言之一切衆生所須樂具皆悉充足菩薩修大慈悲行檀波羅密給足衆生一切樂具其事如是佛告阿難爾時波羅柰大王者今現我父悅頭檀是爾時母者今現我母摩耶夫人是爾時惡友太子者今提婆達多是爾時善友太子者今我身是阿難提婆達多過去世時常懷惡心毀害於我而我以忍辱力常念施恩因乃得濟况今成佛佛說此法時無量百千人得須陀洹果乃至阿羅漢果復有無

量百千人皆發阿耨多羅三藐三菩提心乃至無量百千衆生皆發聲聞辟支佛心阿難白佛言當何名此經云何奉持佛言此經名佛報恩方便給足一切衆生衆會聞經歡喜作禮而去復次提婆達多雖復隨佛出家嫉

星四

十六

妬情深窺望利養雖復能多讀誦六萬香象經典而不能免阿鼻獄罪是人與阿闍世王共爲親善心相愛念信用其言時提婆達多報阿闍世王言汝可作新王我亦欲作新佛阿闍世報言此事不然父王存在提婆達多

言汝應除之我亦欲滅佛然後新王新佛教化衆生不亦快乎時阿闍世即隨其言斷父王命王波羅奈國提婆達多報阿闍世王言我欲毀害如來阿闍世言如來有大神力預知人之所念汝今云何乃能加害如來兼有諸大弟子舍利弗大目犍連欽婆羅阿覩樓駄等提婆達報阿闍世王言王今助我阿闍世言何所作爲報言大王當立制限不聽施諸比丘衣被飲食阿闍世王遍宣令言若有施諸比丘衣被飲食者當斷汝手足是諸大弟

子一切大衆共佛住者閻崛山次第乞食了
不能得一日乃至七日舍利弗諸大弟子等
皆以神力而往諸方求乞衣食時提婆達多
白阿闍世王言佛諸大弟子等今皆不在如
來單獨一身王可遣使往請如來若入宮城
即當以酒飲五百大惡黑象極令奔醉佛若
受請來入城者當放大醉象而蹋殺之時阿
闍世王遣使往請如來佛與五百阿羅漢即
受王請前入王舍城爾時阿闍世王即放五
百醉象奔逸據按樹木摧折牆壁崩倒哮嚇

卷四
十七

大吼向於如來時五百阿羅漢皆大恐怖踊
在空中徘徊佛上爾時阿難圍遶如來恐怖
不能得去爾時如來以慈悲力即舉右手於
五指頭出五師子開口哮吼五百醉象恐怖
躡地爾時如來大衆圍遶前入王宮時阿闍
世王即出奉迎請佛令坐佛即坐已求哀憐
悔白佛言世尊非是我過提婆達多耳佛言
大王我亦知之提婆達多常欲害我非適今
也過去世時亦常欲毀害我以慈悲力乃能
得濟爾時阿闍世王又手前白佛言世尊提

婆達多過去世時毀害如來其事云何佛言
諦聽吾當爲汝分別解說乃往過去不可計
劫有大國王喜食鴈肉使一獵師常網捕鴈
時有五百羣鴈從北方來飛空南過中有鴈
王墮獵網中爾時獵師心大歡喜即出草菴
欲取殺之時有一鴈悲鳴吐血徘徊不去爾
時獵師彎弓欲射不避弓矢目不暫捨即鼓
兩翅來投鴈王五百羣鴈徘徊虛空亦復不
去爾時獵師見此一鴈悲鳴吐血顧戀如是
爾時獵師作是念言鳥獸尚能共相戀慕不

惜身命其事如是我今當以何心而殺是鴈
王尋時開網放使令去爾時一鴈悲鳴歡喜
鼓翅隨逐五百羣鴈前後圍遶飛空而去爾
時獵師即白大王網得一鴈王應送王厨供
辦飲食而見一鴈悲鳴吐血不避弓矢徘徊
三十四
不去時念此鴈尋放鴈王五百隨從前後圍
遶飛空而去爾時大王聞是語已心意慘然
尋發慈心鳥獸共相愛念護惜他命其事如
是爾時大王即斷鴈肉誓不復捕大王當知
爾時王者今大王身是爾時獵師者今提婆

達多是爾時一鴈悲鳴吐血者今阿難是爾時五百羣鴈者今五百阿羅漢是爾時鴈王者今我身是爾時阿難心生顧戀如本不異爾時五百阿羅漢飛騰虛空亦如本不異爾時提婆達多常欲毀害於我我以慈悲力故因乃得濟說是法時無量百千人或得初果乃至四果或發阿耨多羅三藐三菩提心乃至聲聞辟支佛心復次提婆達多惡心不息而作是念我今應當長養十指爪甲極令長利於爪甲下塗以毒藥往如來所頭面接足

禮時我當以十指甲掐足踝上毒藥入體其必喪命作是念已如所思惟往如來所頭面作禮以手接足爾時毒藥變成甘露於如來身竟無所為復次提婆達多既不果願復作是念如來今者坐者閻崛山下我今應當上山頂上排山下石斷其命根作是念已上山推石傷佛足指我慈悲心怨親同等復次提婆達多過去久遠不可計劫爾時有佛出興于世號曰應現如來應供正遍知明行足善逝世間解無上士調御丈夫天人師佛世尊

佛滅度後於像法中有一坐禪比丘獨住林中爾時比丘常患蟻風即便共風而作約言我若坐禪汝宜嘿然隱身寂住其風如法於後一時有一土蚕來至風邊問言汝云何身體肌肉肥盛風言我所依主人常修禪定教我飲食時竟我如法飲食故所以身體鮮肥蚕言我亦欲修習其法風言能爾隨意爾時比丘尋便坐禪爾時土蚕聞血肉香即便食歟爾時比丘心生苦惱即便脫衣以火燒之佛言爾時坐禪比丘者今迦葉佛是爾時土

蚕者今提婆達多是爾時風者今我身是提婆達多爲利養故毀害於我乃至今日成佛亦爲利養出佛身血生入地獄提婆達多常懷惡心毀害如來若說其事窮劫不盡而如來常以慈悲力愍而哀傷我以值遇提婆達多故速得成佛念重思故常垂慈愍爾時如來即遣阿難往到地獄問訊提婆達多苦可忍不爾時阿難受如來教至地獄門外問牛頭阿傍言爲我喚提婆達多牛頭阿傍言汝問何佛提婆達多過去諸佛皆有提婆達多

阿難言我喚釋迦牟尼佛提婆達多爾時阿
傍即語提婆達多阿難在外欲得相見提婆
達多即言善來阿難如來猶能憐念於我耶
阿難言如來遣我問訊苦痛可堪忍不提婆
達多言我處阿鼻地獄猶如比丘入三禪樂

三十四

二十

佛言菩薩摩訶薩修大方便引接衆生具受
生死無量大苦不以爲患若有人言提婆達
多實是惡人入阿鼻獄者無有是處如來爾
時即爲大衆顯發提婆達多微密妙行大方
便時無量百千菩薩得無生法忍無量百千

人發阿耨多羅三藐三菩提心無量百千人
得須陀洹果乃至阿羅漢虛空神天雨衆天
華遍覆大衆作天妓樂放大光明讚言善哉
如來所說未曾有也一切大衆聞佛說法頭
面作禮歡喜而去

大方便佛報恩經卷第四

音釋

紡妃兩切剝拔闥音拔閻軒閻殊倫房六
也紡績也剝剝音拔閻軒閻殊倫房六
廁初更切閼閼音拔閻軒閻殊倫房六
同閼切與閼也閼音拔閻軒閻殊倫房六

永樂北藏

大方便佛報恩經

第五一冊